

Roman Urdu



HAZRAT ISA AL-MASIH KE KHAAS TALEEMAAT

HAZRAT ISA AL-MASIH KE KHAAS TALEEMAAT

Pichhle sabq mein, main ne Hazrat Isa Al-Maseeh ki paidaish aur un ke mojizaat ke baare mein bataya tha. Bahut se nabiyon ne Hazrat Isa Al-Maseeh ki paidaish ki peshangoi ki thi. Farishte bhi aaye aur Hazrat Maryam Alaihissalaam aur doosre logon ko bataya ke Hazrat Isa Al-Maseeh paida hone wale hain. Woh baghair baap ke paida hue. Allah ne unhein bheja taa-ke woh hamare gunaahon ki maafi ke liye qurbani dein. Kya kisi aur nabi ki paidaish itni khaas thi?

Hazrat Isa Al-Maseeh ne beemaron ko theek kiya, murdon ko zinda kiya. Yeh sab mojize unhon ne is liye kiye taa-ke gunahgaaron par apni muhabbat zaahir karein. Unhein Allah ne itna ikhtiyaar diya tha ke woh gunaah maaf kar sakte the aur hamare dilon ke chhupe hue khayaal bhi jaante the. Kya kisi aur nabi ne itne mojize kiye?

Aaj hum Hazrat Isa Al-Maseeh ki khaas taleemaat par ghaur kareinge. Unhon ne farmaya: "Raah aur haq aur zindagi main hoon. Koi mere waseele ke baghair Khuda baap ke paas nahin aa sakta."

To ghaur karein, Hazrat Isa Al-Maseeh ki paidaish khaas thi, unhon ne bade bade mojize kiye, aur un ki taleemaat bhi bahut zabardast thin. Magar sab se khaas baat yeh hai ke Hazrat Isa Al-Maseeh ne hamare gunaahon ki maafi ke liye apni jaan qurbaan ki. Unhein dafn kiya gaya, aur teesre din woh dobara zinda ho gaye. Phir woh aasman par utha liye gaye. Ab woh jannat mein hain aur Qiyamat ke din ka intezaar kar rahe hain.

Ab main Hazrat Isa Al-Maseeh ki taleemaat mein se ek aur paighaam sunana chahta hoon, jo "Injeel Shareef" mein hai. Yeh paighaam "Pahaari Waiz" ke naam se mashhoor hai, jo Matti baab paanch, chhe aur saat mein hai.

Aaiye, ab hum Injeel-e-Matti (7:24-27) se sattaish parhte hain:

Lihaaza jo bhi meri yeh baatein sun kar un par amal karta hai woh us samajhdaar aadmi ki maanind hai jis ne apne makaan ki bunyaad chattaan par rakhi.

Barish hone lagi, sailaab aaya aur aandhi makaan ko jhanjhorne lagi. Lekin woh na gira, kyunki us ki bunyaad chattaan par rakhi gayi thi.

Lekin jo bhi meri yeh baatein sun kar un par amal nahin karta woh us ahmaq ki maanind hai jis ne apna makaan saheeh bunyaad daale baghair rait par tameer kiya.

Jab barish hone lagi, sailaab aaya aur aandhi makaan ko jhanjhorne lagi to yeh makaan dharaam se gir gaya."

Yeh taleem humein batati hai ke do tarah ke log hote hain.

Ek woh jo Hazrat Isa Al-Maseeh ki baat bhi sunte hain aur us par amal bhi karte hain.

Doosre woh log hain jo sirf baat sunte hain, magar us par amal nahin karte. Donon ne baat

suni, lekin farq yeh tha ke ek ne baat par amal kiya jabke doosre ne amal nahin kiya. Achhe insaan ki misaal us shakhs ki hai jis ne apna ghar mazboot zameen par, yani chattaan par banaya.

Aur bewakoof insaan ki misaal us shakhs ki hai jis ne apna ghar kacchi zameen yani rait par banaya. Jab zindagi mein mushkil waqt aata hai — chahe woh beemari ho, paision ki tangi ho, ya ghar ka koi masla ho — to jo Hazrat Isa Al-Maseeh ki baaton par amal karta hai, woh saabit qadam rehta hai. Magar jo amal nahin karta, woh mushkil waqt mein toot jaata hai, jaise kamzor ghar toofaan mein gir jaata hai.

Yeh taleem humein Hazrat Isa Al-Maseeh ki azmat batati hai.

Khair, main ek aur aayat parhoonga, jo "Injeel Shareef" mein, Yuhanna baab chaudah — us ki aayat chhe mein hai. Hazrat Isa Al-Maseeh ne farmaya:

Raah aur haq aur zindagi main hoon. Koi mere waseele ke baghair baap ke paas nahin aa sakta.

Agar aap Allah tak pahunchne ka raasta talaash kar rahe hain, to Hazrat Isa Al-Maseeh hi woh raasta hain.

Agar hum un ki baaton par amal kareinge, to woh humein Allah tak le jaayeinge. Lekin shart yeh hai ke hum un ki baaton ko sunein aur us par amal bhi karein. Hazrat Isa Al-Maseeh ne farmaya ke main "haq" hoon. Agar aap haq ko jaanna chahte hain, to Hazrat Isa Al-Maseeh ke paas aayein. Un ki baatein sunein. Jaise jaise aap un ke saath chaleinge, woh aap ko haq dikhaayeinge. Unhon ne farmaya ke main "zindagi" hoon. Yahan woh "hamesha ki zindagi" yani jannat ki zindagi ki baat kar rahe hain.

Aaj Hazrat Isa Al-Maseeh ki qabr khaali hai, kyunki woh dobara zinda ho kar jannat chale gaye. Agar aap bhi hamesha ki zindagi chahte hain, to un ki baatein maanein aur un par amal bhi karein. Umeed hai ke aap ne Hazrat Isa Al-Maseeh ki azmat ko pehchana hoga. Un ki paidaish sab se khaas thi. Un ke mojize sab se bade the. Un ki taleemaat sab se sachchi thin.

Aur sab se barh kar, woh hamare gunaahon ki maafi ke liye qurbani dene aaye the.

Aaj aap ke paas mauqa hai ke Hazrat Isa Al-Maseeh ki baat sunein, apne gunaahon se tauba karein, aur un ke shagird ban jaayein.

Hamse Jurhne ke liye Icons par click karen.....

